

Minister Hooyboer-Winklaar di bishita na Aruba Way Foundation



DIABIerna mainta, nos Minister di Economia, Cultura y Asuntonan Social, Minister Michelle Hooyboer-Winklaar a haci un bishita na Aruba Way Foundation. Durante e bishita aki, representantenan di Aruba Way Foundation a tuma e oportunidad pa entrega Famia Planea y Cemrah e checknan oficial di e suma cu a keda recauda cu e grandioso caminata cu a tuma lugar dia 26 di september ultimo.

E aña aki tabata e di 5 aña cu Aruba Way a organisa su tan popular fun walk/run. E meta di Aruba Way su evento anual ta pa sostene fundacionnan cu ta haci un tremendo trabou den comunidad di Aruba y tambe pa yuda conscientisa nos comunidad riba problemanan cu tin den nos comunidad. Aruba Way a dicidi di duna e fondonan recauda e aña aki na Famia Planea y Cemrah cu ta dos organisacion

cu ta trahando incansabel pa educa y conscientisa nos hubentud riba e tereno di seksualidad y embaraso hubenil.

E fun walk/run e aña aki tabata un exito rotundo den tanto cantidad di persona cu a participa na e evento dia 26 di september como tambe na fondonan recauda. E aña aki e suma record di Awg. 38,250 a wordo recauda, esaki door di benta di t-shirt y tambe contribucionnan generoso di companianan. Ademas cu cada fundacion a ricibi Awg. 19,125 recauda di e caminata, Famia Planea a ricibi un suma adicional di Awg. 15,675.00 y Cemrah a ricibi un suma di Awg. 26,800.00 adicional di Aruba Way Foundation. Durante su bishita Minister Hooyboer-Winklaar a gradici Aruba Way pa su aporte y contribucion na nos comunidad, tambe e la gradici e empleadonan di e refinaria cu ta

contribuidor na di Aruba Way y a expresa cu nan ta pioneronan den comunidad y cu trahando uni nos por logra un miho Aruba. Representante di Famia Planea, sra. Eveline Yarzagaray y tambe representantenan di Cemrah sra. Monique Labad y sr. Ricky Hoek a haci uso di e oportunidad pa gradici e comision organisatorio y tur miembro di Aruba Way pa e confiansa y aporte duna na e causa. Nan a priminti cu e fondonan lo wordo usa pa sigui cu e trabou incansabel cu nan tin pa asina educa nos hubentud encuan to seksualidad y embaraso hubenil. Minister Hooyboer-Winklaar ta sumamente orguyoso cu e trabou di Aruba Way Foundation y ta haña cu "si nos tur kier un mihor Aruba, nos tur tin cu traha pe. Tanto gobierno como sector priva".

Na e ocasion aki tabata presente miembronan di e comision organisatorio di

e caminata esta Kenrick Tromp, Candy Rasmijn, Judella Jeandor, Nathalie Fowler, Janella Vrolijk, Haydelyn Thijsen, Maryann Falconi-Rasmijn y Joannette Vrutaal, como tambe empleadonan di e refinaria cu a parti check cual ta Regine Christiaans, Micah Cicilia, Jeffrey Schwengle y Orphilo Bijlhout conhuntamente cu miembronan di directiva di Aruba Way Foundation esta Paul Arends y Raymond Buckley, respectivamente tesorero y secretario di Aruba Way.

Aruba Way Foundation kier a gradici tur e empleadonan cu ta contribui y alabes full e comunidad di Aruba pa e confiansa deposita den e trabou di e fundacion durante tur e añanan aki y ta spera cu por sigui conta cu e confiansa aki den futuro. Ta solamente hunto, nos por logra un mihor Aruba!